

इवनिंग डोगरी न्यूज़ बुलेटिन

समे 18:15 Hrs

<><><><><><>

### Headlines

- राष्ट्रपति द्रौपदी मुर्मू होर, स्वतंत्रता दिवस दी पूर्व संज्ञा अज्ज राष्ट्र गी सम्बोधित करगंन।
- समूलचा मुख कल अपना 79मां स्वाधीनता दिवस मनाने जा रदा ऐ। प्रधानमंत्री नरेन्द्र मोदी ऐतिहासिक लाल किले थमां इस समारोह च राष्ट्र दी अगुवाई करगंन।
- किशतवाड़ जिले दे चसोती इलाके च बददल फटने दी घटना च घट्टो-घट्ट 10 जनै दी जान जाने दी शैका।
- स्वतंत्रता दिवस दे मौके पर जम्मू-कश्मीर पुलसै गी 127 वीरता पदक देने दा ऐलान।
- ते समूलचें जम्मू प्रांतै च बी “हर घर तिरंगा” रैलियें दा जोश, चबक्खिया देश-प्रेम दी लैहर।

<><><><><><>

### Prez Address

राष्ट्रपति द्रौपदी मुर्मू होर अज्ज 79में स्वतंत्रता दिवस दी पूर्व संज्ञा राष्ट्र गी संबोधित करडन। एह संबोधन संज्ञा 7 बजे थमां आकाशवाणी दे समूलचे राष्ट्री नेटवर्क उप्पर प्रसारित होग। एह दूरदर्शन दे सब्भनै चैनलें पर हिंदी ते अंग्रेजी च प्रसारित होग। एहदे मगरा दूरदर्शन दे क्षेत्रीय चैनलें आसेआ क्षेत्रीय भाषायें च बी एहदा प्रसारण कीता जाग। आकाशवाणी अपने सरबंधत क्षेत्रीय नेटवर्क उप्पर रातीं साड्डे 9 बजे इलाकाई भाषायें च एहदा प्रसारण करोग।

<><><><><><>

### PM-I-Day

राष्ट्र कल 79मां स्वतंत्रता दिवस मना'रदा ऐ ते प्रधानमंत्री नरेन्द्र मोदी होर दिल्ली दे लाल किले थमां इस समारोह च राष्ट्र दा नेतृत्व करडन। मोदी होर ऐतिहासिक लाल किले दे परकोटे थमां राष्ट्री तिरंगा चाढ़डन ते राष्ट्र गी संबोधित करडन। राष्ट्र 2047 तगर विकसित भारत दे सरकार दे लक्ष गी साकार करने दी दिशा च तेजिया कन्नै अगगे बधा'रदा ऐ। इस्सै लेई इस ब'रै समारोह दा विषे ऐ-“नमां भारत”। एह समारोह इक समृद्ध, सुरक्षित ते साहसिक नमै भारत दे निरंतर उदय दा चेता करने ते प्रगति दी बता उप्पर अगड़े बधने लेई नमी उर्जा प्रदान करने दे इक मंच दे रूप च कम्म करोग।

<><><><><><>

## Cloud Burst

किश्तवाड़ जिले दे पाडर इलाके च अज्ज बददल फटट्ने दी घटना पेश आई ऐ, जेहदे कारण काफी नुकसान दी शैकां जताई जा करदी ऐ। घटना च घट्टो-घट्ट 10 लोकें दे मारे जाने दी शैका ऐ। इस क्रोपी च 75 लोकें दे घायल होने दी बी खबर ऐ। आकाशवाणी दे जम्मू संवाददाता नै जानकारी दिती ऐ जे घटना मचेल माता यात्रा दे रस्ते च इक दूर-दरेडे गां चसोती च पेई आई ऐ। मचेल माता यात्रा लेई चसोती तगर गै सिड़क ऐ ते ओहदे अग्गे सफर श्रद्धालुएं गी पैदल गै तय करना पौन्दा ऐ। इस हादसे दे बाद यात्रा गी फिलहाल रोकी दिता गेदा ऐ ते हादसे आहले थाहरै पर राहत ते बचाव कारवाई युद्ध स्तरै पर चलै करदी ऐ। केन्द्री गृहमंत्री अमित शाह होरें सोशल मीडिया प्लेटफार्म-एक्स पर लिखेया ऐ जे, उनें जम्मू-कश्मीर दे उपराज्यपाल ते मुखमंत्री हुन्दे नै गल्ल करियै किश्तवाड़ च बददल फटने दी घटना बारै जानकारी हासल कीती ऐ। केन्द्री मंत्री डाक्टर जितेन्द्र सिंह होरें दस्सेया जे उनें बी मुखमंत्री उमर अब्दुल्ला ते DC किश्तवाड़ कन्ने इस बारे गल्ल करियै हालात दा जायजा लैता ऐ। इस माड़ी घटना दे बारे च मीडिया कन्ने गल्ल करदे होई ADC किश्तवाड़ पवन कोतवाल होरें आकखेया



## Condolences

किश्तवाड़ जिले च पेश आई दी बददल फटने दी घटना पर राष्ट्रपति द्रौपदी मुरमू- प्रधानमंत्री नरेन्द्र मोदी- जम्मू-कश्मीर दे उपराज्यपाल मनोज सिन्हा ते मुखमंत्री उमर अब्दुल्ला होरें गैहरा दुख प्रगट करदे होई मारे गेदें दी आत्मा दी शांति ते लापता लोकें दे सुरक्षत होने दी कामना कीती ऐ। उनें इस क्रोपी च घाल होए दे, दी तौले नरोए होने लेई बी प्रार्थना कीती ते प्रभावत परिवारें कन्ने हमदर्दी प्रगट कीती ऐ।



## Poonch Floods

पुंछ च बी जारी भारी बरखें करी दरेयाएं ते नालें च पानी दा स्तर बड़ा मता उप्पर आई गेदा ऐ। पुंछ कस्बे दे झिगड़े इलाके च पानी सिड़कें पर जमा होई गेदा ऐ टकोहदा करियै बस अड्डे ते शंकर नगर इलाके च एहदा आम जन-जीवन पर माड़ा असर दिक्खने गी लब्बै करदा ऐ। खराब मौसम दे चलदे गड्डियें दी आओ-जाई ते आम जनजीवन बी प्रभावत होआ करदा ऐ। पैदल टुरने आहलें, मोटर साईकल, स्कूटर चलाने आहलें, हट्टियें-दकानें आहलें सब्भनें गी भारी दिक्कत दा सामना करना पवा रदा ऐ।



## Homeopathic Coll

उत्तर-भारत दा पैहला-पैहला होम्योपैथी कालेज कठुआ जिले दे जसरोटा इलाके च तौले गै खोलेया जाहग। एह घोषणा विधायक राजीव जसरोटिया होरें अपने इक सोशल मीडिया संदेश च कीती ऐ, जेहदे च उनें केन्द्री मंत्री डाक्टर जितेन्द्र सिंह हुंदा एहदे लेई आभार प्रगट कीता ऐ। 80 करोड़ रपे दी लागत कन्ने तयार होने आहला एह होम्योपैथी कालेज जसरोटा दे रख-होशियारी इलाके च 8 एकड़ दे रकबे च बनाया जाहग, जेहदे

च अस्पताल, कालेज, प्रशासनिक ब्लॉक ते विद्यार्थियों लेई, कुड़ियों ते जागते दे बक्ख-बक्ख होस्टल बी होगन। इस बारे जानकारी दिंदे होई जसरोटा थमां MLA राजीव जसरोटिया होरे आक्खेया



### JKP Gallantry Awards

जम्मू-कश्मीर पुलसै लेई स्वतंत्रता दिवस दे मौके पर 127 वीरता पदके दा ऐलान कीता गया ऐ। पुलसै दी बहादुरी लेई दिते गेदे तगमे च जम्मू-कश्मीर पुलसै गी सब्भनें शा मते तगमे थहोए न। आकाशवाणी दे जम्मू संवाददाता नै जानकारी दिती ऐ जे केन्द्री गृह मंत्रालय आसेया इनै सम्माने दी घोषणा पुलस, होमगार्ड, फायर ब्रिगेड, सिविल डिफेंस ते होरनें सेवाएं लेई दिते जन्दे न। एह सम्मान सब्भनें राज्ये ते केन्द्र शासत प्रदेशे च पुलस बले दी दलेरी, निष्ठा ते समर्पण भाव कन्ने कीती जाने आहली सेवा लई दिते जन्दे न। जम्मू-कश्मीर पुलसै गी एहदे इलावा दंडु राष्ट्रपति पुलस मैडल विशिष्ट सेवा लेई ते उत्कृष्ट सेवा लेई 14 पुलस मैडल बी देते गेन।



### Tiranga Rallies

हर घर तिरंगा अभियान तैहत जम्मू जिला प्रशासन आसेया इक व्यापक तिरंगा रैली दा सरिस्ता कीता गया। इस रैली गी जम्मू दे डिविजनल कमीशनर रमेश कुमार होरे गुलशन ग्राउंड थमां झंडी दस्सियै रवाना कराया। ए रैली युनिवर्सिटी ते गुज्जर नगर हुंदे होई महाराजा हरि सिंह पार्क आइयै सम्पन्न होई गई। जम्मू दे डिप्टी कमीशनर, IGP जम्मू, बक्ख-बक्ख मैहकमे दे वरिष्ठ अधिकारी ते सैकड़ा बद्दे स्कूली बच्चें एदे च हिस्सा लैता। इस मौके पर बोलदे होई जम्मू दे डिविजनल कमीशनर रमेश कुमार होरे आक्खेया।

NCC कैडेट ते इक विद्यार्थी नै अपने विचार इस बारे सांझे करदे होई आक्खेया

कठुआ दे डिप्टी कमीशनर राजेश शर्मा होरे बी स्पोर्ट्स स्टेडियम कठुआ थमां इक रैली गी झंडी दस्सियै रवाना कीता। एदे च युवाएं ते शैहरदारें खरी मती गिनतरी च हिस्सा लेया। बड़ी मती बरखा दे बावजूद बी लोक रैली च शामिल होए ते उनें हत्थें च तिरंगे बड़े गै शान्ने कन्ने फगड़े दे हे। इस मौके पर मीडिया कन्ने गल्ल करदे होई DC कठुआ राजेश शर्मा होरे आक्खेया

पुंछ दे जिला प्रशासन आसेया बी इक व्यापक तिरंगा रैली दा सरिस्ता कीता गया। भारी बरखा दे बावजूद खरे मते लोकें बड़े गै उत्साह कन्ने एदे च हिस्सा लैता। मीडिया-कर्मिये कन्ने गल्ल करदे होई अडीशनल SSP मोहन शर्मा होरे आक्खेया

इस्सै चाली रामबन जिले च बी पूरी देशभक्ति आली भावना कन्ने तिरंगा बाईक रैली कड़्डी गई। इस मौके पर मीडिया कन्ने गल्ल करदे होई ARTO रामबन कुलदीप सिंह होरे आक्खेया



## Partition Horrors Day

जम्मू च बी अज्ज पूरे मुल्खे आहला लेखा विभाजन विभीषिका समृति दिवस मनाया गेआ। अज्जे दे दिन उनें लोकें दी श्रद्धाजली दिती जन्दी ऐ, जिनें गी 1947 दी बंड करी केई सारियां परेशानिया ते मुश्कला ढलनियां पेईयां हियां। अभिनव थियेटर जम्मू च जम्मू कश्मीर कला संस्कृति ते भाषाएं सरबंधी अकादमी आस्सेआ आयोजित सरबंधी समारोह च जम्मू दे डिविजनल कमीशनर रमेश कुमार होरे शिरकत कीती। ते प्रदर्शनी दा उद्घाटन कीता। इत्थे ऐतिहासिक फोटूएं दी इक नमैश लाई गेई ऐ जेहदे राहें बंड दरान लोकें गी झल्लनी पेदी तकलीकें गी दर्शाया गेआ ऐ। इस मौके पर बोलदे होई जम्मू दे डिविजनल कमीशनर रमेश कुमार होरे आक्खेआ

एदे थवा पैहले अज्ज बडलै उप राज्यपाल मनोज सिन्हा होरे मुख दी बंड करी जिनें लोकें गी तकलीकें गी झलना पेआ उनें गी चेता कीता ते श्रद्धा सुमन अर्पित कीते।

